

东宫妃嫔部汇考

汉

汉初定礼皇太子纳妃以奉常迎

按汉书礼志不载 按杜佑通典汉制皇太子纳妃奉常迎时叔孙通定礼以天子无亲迎之义皇太子以奉常迎也

晋

晋太子婚礼及太子妃金玺之制

按晋书礼志江左以来太子婚纳征礼用玉璧一兽皮二未详何所准或者兽取其威猛有斑彩玉以象德而有珪璋亦玉之美者豹皮采蔚以譬君子王萧纳征辞云元纁束帛俪皮雁羊前汉聘后黄金二百斤马十二匹亦无用羊之旨郑氏婚物赞曰羊者祥也然则婚之有羊自汉末始也王者六礼尚未用焉 按舆服志皇太子妃用金玺龟钮纁朱绶佩瑜玉

宋

文帝元嘉十五年立皇太子妃百官上礼大宴于太极殿

按宋书文帝本纪元嘉十五年夏四月立皇太子妃殷氏赐王公以下各有差 按礼志元嘉十五年四月皇太子纳妃六礼文与纳后不异百官上礼其月壬戌于太极殿西堂叙宴二宫队主副司徒征北镇南三府佐扬兖江三州纲彭城江夏南谯始兴武陵庐陵南丰七国侍郎以上诸二千石在都邑者并豫会又诏今小会可停妓乐时有临川曹太妃服

孝武帝孝建三年春正月壬子立皇太子妃何氏甲寅大赦天下

按宋书孝武帝本纪云云

大明五年太子妃何氏薨有司议樟宫山莹及丧服之制又议不合作乐及行烝祠之礼

按宋书孝武帝本纪大明五年闰月戊子皇太子妃何氏薨 按礼志宋孝武大明五年闰月皇太子妃薨樟木为椁号曰樟宫载以龙輶造陵于龙山置大

匠卿断草司空告后土谓葬曰山莹祔文元皇后庙之阴室在正堂后壁之外北向御服大功九月设位太极东宫堂殿中监黄门侍郎仆射并从服从服者御服衰乃从服他日则否宫臣服齐衰三月其居宫者处宁假 大明五年闰月有司奏依礼皇太后服太子妃小功五月皇后大功九月右丞徐爰参议宫人从服者若二御哭临应着衰时从服者悉着衰非其日如常仪太子既有妃口服诏见之日还着公服若至尊非哭临日幸东宫太子见亦如之宫臣见至尊皆着朱衣 大明五年闰月有司奏皇太子妃薨至尊皇后并服大功九月皇太后小功五月未详二御何当得作鼓吹及乐博士司马兴之议案礼齐衰大功之丧三月不从政今临轩拜授则人君之大典今古既异除促不同愚谓皇太子妃祔庙之后便可临轩作乐及鼓吹右丞徐爰议皇太子妃虽未山莹临轩拜官旧不为碍樟棺在殡应县而不作祔后三御乐宜使学官拟礼上兴之又议案礼大功至则辟琴瑟诚无自奏之理但王者体大理绝凡庶故汉文既葬悉皆复吉唯县而不乐以此表哀今准其轻重侔其降杀则下流大功不容撤乐终服夫金石宾飨之礼箫管警涂之卫实人君之盛典当阳之威饰固亦不可久废于朝又礼无天王服嫡妇之文直后学推贵嫡之义耳既已制服成丧虚悬终窆亦足以甄崇冢正標明礼归矣爰参议皇太子期服内不合作乐及鼓吹 又按大明五年十月甲寅有司奏今月八日烝祠二庙公卿行事有皇太子献妃服前太常丞庾蔚之议礼所以有丧废祭由祭必有乐皇太子以元嫡之重故主上服妃不以尊降既正服大功愚谓不应祭有故三公行事是得祭之辰非今之比卿卒犹不绎况于太子妃乎博士司马兴之议夫总则不祭礼之大经卿卒不绎春秋明义又寻魏代平原公主薨高堂隆议不应三月废祠而犹云殡葬之间则权废事改吉芬馥享祠寻此语意非使有司此无服之丧尚以未葬为废况皇太子妃及大功未祔者

耶上寻礼文下准前代不得烝祠领军长史周景远
议案礼絜不祭大功废祠理不俟言今皇太子故妃
既未山莹未从权制则应依礼废絜尝至尊以大功
之服于礼不得亲奉非有故之谓亦不使公卿行事
右丞徐爰议以为礼絜不祭盖惟通议大夫以尊贵
降绝及其有服不容复异祭统云君有故使人可者
谓于礼应祭君不得齐祭不可阙故使臣下摄奉不
谓君不应祭有司行事也晋咸宁四年景献皇后崩
晋武帝伯母宗庙废一时之祀虽名号尊崇粗可依
准今太子妃至尊正服大功非有故之比既未山莹
谓絜祠宜废寻蔚之等议指归不殊阙絜为允过卒
哭祔庙一依常典诏可

明帝泰始五年奏定太子纳征之礼

按宋书明帝本纪不载 按礼志泰始五年十一月
有司奏按晋江左以来太子婚纳征礼用玉一虎皮
二未详何所准况或者虎取其威猛有彬炳玉以象
德而有栗珪璋既玉之美者豹皮义兼炳蔚熊罴
亦婚礼吉征以类取象亦宜并用未详何以遗文晋
氏江左礼物多阙后代因袭未遑研考今法章徽仪
方将大备宜宪范经籍稽诸旧典今皇太子婚纳征
礼合用珪璋豹皮熊罴皮与不下礼官详依经记更
正若应用者为各用一为应用两博士裴昭明议案
周礼纳征元纁束帛俪皮郑元注云束帛以仪注以
虎皮二太元中公主纳征以虎豹皮各一具岂谓婚
礼不辨王公之序故取虎豹皮以尊革其事乎虎豹
虽文而征礼所不用熊罴吉祥而婚典所不及珪璋
虽美或为用各异今帝道弘明徽则光阐储皇聘纳
宜准经诰凡诸僻谬并合详裁虽礼代不同文质或
异而郑为儒宗既有明说守文浅见盖有惟疑兼太
常丞孙洗议以为聘币之典损益惟义历代行事取
制士婚若珪璋之用实均璧品采豹之彰义齐虎文
熊罴表祥繁衍攸寄今储后崇聘礼先训远皮玉之
美宜尽晖备礼称束帛俪皮则珪璋数合同璧熊罴
文豹各应用二长兼国子博士虞龢议案仪礼纳征

直云元纁束帛杂皮而已礼记郊特牲云虎豹皮与玉璧非虚作也则虎豹之皮居然用两珪璧宜仍旧各一也参洗酈二议不异今加珪璋各一豹熊罴皮各二以酈议为允诏可

泰始六年二月癸丑皇太子纳妃甲寅大赦天下巧注从军不在赦例班赐各有差

按宋书明帝本纪云云

南齐

高帝建元元年冬十一月辛亥立皇太子妃裴氏

按南齐书高帝本纪云云

建元三年为太子宫置三内职

按南齐书高帝本纪不载 按后妃传序建元三年太子宫置三内职良娣比开国侯保林比五等侯才人比驸马都尉

武帝永明 年以婚礼奢侈口诸王纳妃惟上枣栗

按南齐书武帝本纪不载 按礼志武帝永明中以婚礼奢费口诸王纳妃上御及六宫依礼止枣栗殿修加以香泽花粉其余衣服皆停惟公主降嫁则止遗舅姑也

明帝建武二年冬十月乙卯纳皇太子妃褚氏大赦王公以下班赐各有差断四方上礼

按南齐书明帝本纪云云

梁

武帝天监七年夏四月乙卯皇太子纳妃赦大辟以下颁赐朝臣及近侍各有差

按梁书武帝本纪云云

陈

文帝天嘉三年皇太子纳妃王氏

按陈书文帝本纪天嘉三年秋七月己丑皇太子纳妃王氏在位文武赐帛各有差孝悌力田为父后者赐爵二级

宣帝大建元年皇太子纳妃沈氏

按陈书宣帝本纪大建元年秋七月辛卯皇太子纳妃沈氏王公以下赐帛各有差

北齐

北齐定皇太子纳妃之礼

按隋书礼仪志后齐皇太子纳妃礼皇帝遣使纳采有司备礼物会毕使者受诏而行主人迎于大门外礼毕会于厅事其次问名纳吉并如纳采纳征则使司徒及尚书令为使备礼物而行请期则以太常宗正卿为使如纳采亲迎则太尉为使三日妃朝皇帝于昭阳殿又朝皇后于宣光殿择日群官上礼他日妃还又他日皇太子拜合 后齐聘礼一曰纳采二曰问名三曰纳吉四曰纳征五曰请期六曰亲迎皆用羔羊一口雁一只酒黍稷稻米各一斛纳征皇子王用青三匹纁二匹束帛十匹大璋一兽皮二锦彩六十匹绢二百匹羔羊一口羊四口犊一头酒黍稷稻米各十斛

北周

武帝建德二年九月壬午纳皇太子妃杨氏

按周书武帝本纪云云

隋

隋定皇太子纳妃之礼

按隋书礼仪志皇太子纳妃礼皇帝临轩使者受诏而行主人俟于庙使者执雁主人迎拜于大门之东使者入升自西阶立于楹间南面纳采讫乃行问名仪式毕主人请致礼于从者礼有币马其次择日纳吉如纳采又择日以玉帛乘马纳征又择日告期又择日命有司以特牲告庙册妃皇太子将亲迎皇帝临轩谯而诫曰往迎尔相承我宗事勩帅以敬对曰谨奉诏既受命羽仪而行主人几筵于庙妃服褕翟立于东房主人迎于门外西面拜皇太子答拜主人揖皇太子先入主人升立于阼阶西面皇太子升进当房户前北面跪奠雁俯伏兴拜降出妃父少进西面戒之母于西阶上施衿结帨及门内施鞶申之出门妃升辂乘以几姆加幃皇太子乃御轮三周御者代之皇太子出大门乘辂羽仪还宫妃三日鸡鸣夙兴以朝奠笄于皇帝皇帝抚之奠笄于皇后皇后抚

之席于户牖间妃立于席西祭奠而出 皇太子妃乘翟车以赤为质驾三马画轅金饰犊车为副紫幟朱络网良娣以下并乘犊车青幟朱里

文帝开皇十一年春正月景午皇太子妃元氏薨上举哀文思殿

按隋书文帝本纪云云

唐

唐定皇太子纳妃礼及卤簿服饰金玺之制

按唐书礼乐志皇太子纳妃皇帝遣使者至于主人之家不持节无制书纳采问名纳吉纳征告期如后礼其册妃前一日主人设使者次大门之外道右南向又设宫人次于使者西南俱东向障以行帷奉礼设使者位于大门外之西副及内侍又于其南举册案及玺绶命服者又南差退俱东向设主人位于门东北面又设位于内门外如之设典内位于内门外主人之南西面宫人位于门外使者之后重行东向向典内预置一案于合外使副朝服乘辂持节鼓吹备而不作至妃氏大门外次掌严奉褕翟衣及首饰内厩尉进厌翟于大门之外道西东向以北为上诸卫帅其属布仪仗使者出次持节前导及宫人典内皆就位主人朝服出迎于大门之外北面再拜使者入门而左持案从之主人入门而右至内门外位奉册宝案者进授使副册宝内侍西面受之东面授典内典内持入跪置于合内之案奉衣服及侍卫者从入皆立于典内之南俱东面傅姆赞妃出立于庭中北面掌书跪取玉宝南向掌严奉首饰褕翟与诸宫官侍卫者以次入司则前赞妃再拜北面授册宝于掌书南向授妃妃以授司闺司则又赞再拜乃请妃升坐宫官以下皆降立于庭重行北面西上赞者曰再拜皆再拜司则前启礼毕妃降座入于室主人宾使者如礼宾之仪临轩醮戒前一日卫尉设次于东朝堂之北西向又设宫官次于重明门外其日皇太子服冕出升金辂至承天门降辂就次前一日有司设御座于太极殿阼阶上西向设群官次于朝堂

展县陈车辂其日尚舍设皇太子席位于户牖间南向莞席藻席尚食设酒尊于东序下又陈脯一豆醢一在尊西前三刻设群官版位于内奉礼设版位于外如朝礼侍中版奏请中严前三刻诸侍卫之官侍中中书令以下俱诣合奉迎典仪帅赞者先入就位吏部兵部赞群官出次就门外位侍中版奏外办皇帝服通天冠绛纱袍乘輿出自西房即御座西向群官入就位典仪曰再拜赞者承传在位者皆再拜皇太子入县南典仪曰再拜赞者承传皇太子再拜诣阶脱升席西南面立尚食酌酒于序进诣皇太子西东面立皇太子再拜受爵尚食又荐脯醢于席前皇太子升席坐左执爵右取脯擣于醢祭于豆之间右祭酒兴降席西南面坐啐酒奠爵兴再拜执爵兴奉御受虚爵直长彻荐还于房皇太子进当御坐前东面立皇帝命之曰往迎尔相承我宗事勩帅以敬皇太子曰臣谨奉制旨遂再拜降自西阶纳出门典仪曰再拜赞者承传在位者皆再拜以次出侍中前跪奏礼毕皇帝入皇太子既受命执烛前马鼓吹至于妃氏大门外道西之次回辂南向左庶子跪奏降辂之次主人设几筵妃服褕翟花钗立于东房主妇立于房户外之西南向主人公服出立于大门之内西向在庙则祭服左庶子跪奏请就位皇太子立于门西东面候者受命出请事左庶子承传跪奏皇太子曰以兹初婚某奉制承命左庶子俯伏兴传于候者入告主人曰某谨敬具以须候者出传于左庶子以奏候者入引主人迎于门外之东西面再拜皇太子答再拜主人揖皇太子先入掌畜者以雁授左庶子以授皇太子执雁入及内门主人让曰请皇太子入皇太子曰某弗敢先主人又固请皇太子又曰某固弗敢先主人揖皇太子入门而左主人入门而右及内门主人揖入及内溜当曲揖当阶揖皇太子皆报揖至于阶主人曰请皇太子升皇太子曰某敢辞主人固请皇太子又曰某敢固辞主人终请皇太子又曰某终辞主人揖皇太子报揖主人升

立于阼阶上西面皇太子升进当房户前北面跪奠雁再拜降出主人不降送内阼尉进厌翟于内外傅姆导妃司则前引出于母左师姆在右保姆在左父少进西面戒之曰必有正焉若衣花命之曰戒之敬之夙夜无违命母戒之西阶上施衿结帨命之曰勉之敬之夙夜无违命庶母及门内施鞶申之以父母之命命之曰敬恭听宗父母之言夙夜无愆视诸衿鞶妃既出内门至辂后皇太子授绥姆辞不受曰未教不足与为礼妃升辂乘以几姆加景皇太子驭轮三周驭者代之皇太子出大门乘辂还宫妃次于后主人使其属送妃以族从同牢之日司闺设妃次于合内道东南向设皇太子御幄于内殿室内西厢东向设席重茵施屏障设同牢之席于室内皇太子之席西厢东向妃席东厢西向席间量容牢饌设洗于东阶东南设妃洗于东房近北饌于东房西墉下豆各二十簋簋各二钗各三瓦登一俎三尊在室内北墉下元酒在西又设尊于房户外之东无元酒筐在南实四爵合盞皇太子车至左合回辂南向左庶子跪奏请降辂入俟于内殿门外之东西面妃至左合外回辂南向司则请妃降辂前后扇烛就次立于内殿门西东面皇太子揖以入升自西阶妃从升执扇烛者陈于东西阶内皇太子即席东向立妃西向立司饌进诣阶间跪奏具牢饌司则承令曰诺遂设饌如皇后同牢之礼司饌跪奏饌具皇太子及妃俱坐司饌跪取脯取韭菹皆擣于醢授皇太子又取授妃俱受祭于豆之间司饌跪取黍实于左手遍取稷反于右手授皇太子又授妃各受祭于菹醢之间司饌各立取肺皆绝末跪授皇太子及妃俱受又祭于菹醢之间司饌俱以肺加于俎掌严授皇太子妃巾浼手以枲扱上钗遍擣之祭于上豆之间司饌品尝妃饌移黍置于席上以次跪授肺脊皇太子及妃皆食以滫酱三饭卒食司饌北面请进酒司则承令曰诺司饌二人俱盥手洗爵于房入室酌于尊北面立皇太子及妃俱兴再拜一人进授皇太子一人授妃

皇太子及妃俱坐祭酒举酒司饌各以肝从司则进受虚爵奠于筐司饌又俱洗爵酌酒再酌皇太子及妃俱受爵饮三酌用盃如再酌皇太子及妃立于席后司则俱降东阶洗爵升酌于户外北面俱奠爵兴再拜皇太子及妃俱答拜司则坐取爵祭酒遂饮啐爵奠遂拜执爵兴降奠爵于筐司饌奏彻饌司则前跪奏称司则妾姓言请殿下入皇太子入于东房释冕服着口褶司则启妃入帟幄皇太子乃入室媵俊皇太子之饌御俊妃之饌 按仪卫志皇太子妃鹵簿清道率府校尉六人骑分左右为三重佩横刀弓箭次青衣十人分左右次导客舍人四人内给使六十人皆分左右后属内人车次偏扇团扇方扇各十八分左右宫人执者间彩衣革带次行障四坐障二宫人执以夹车次典内二人骑分左右次厌翟车驾三马驾士十四人次合帅二人领内给使十八人夹车次六柱二内给使执之次供奉内人乘犊车次伞一雉尾扇二团扇四曲盖二皆分左右各内给使执之次戟九十执者绛褰袄冒分左右太子良娣良媛承徽青衣二人偏扇团扇方扇十行障二坐障一安车驾二马驭人八内给使十人从车二乘戟二十白铜饰犊车从人十人 又按志皇太子妃之服有三褕翟者受册助祭朝会大事之服也青织成文为摇翟青质五色九等素纱中单黼领朱罗縠褾蔽膝随裳色用緞为领缘以翟为章二等青衣革带大带随衣色不朱里青口加金饰佩绶如皇太子鞠衣者从蚕之服也以黄罗为之制如褕翟无雉蔽膝大带随衣色钿钗礼衣者燕见宾客之服也九钿其服用杂色制如鞠衣加双佩小绶去加履首饰花九树有两博鬓 皇太子妃玺以金为之藏而不用封令书以内坊印

高宗咸亨四年皇太子纳妃裴氏

按唐书高宗本纪咸亨四年十月乙未以皇太子纳妃赦岐州赐脯三日

按旧唐书高宗本纪咸亨四年二月壬午以左金吾

将军裴居道女为皇太子弘妃

元宗开元二十年中书令萧嵩上开元新礼定皇太子纳妃册妃及朝见之礼

按唐书元宗本纪不载 按旧唐书元宗本纪开元二十年九月乙巳中书令萧嵩奏上开元新礼一百五十卷命所司行用之

按开元礼皇太子纳妃临轩命使将行纳采制命使者吏部承以戒之前一日尚书奉御设御幄于太极殿北壁下南向卫尉设群官次于东西朝堂大乐令展宫悬并如常仪其日典仪设文武一品以下五品以上位于横街之北西面北上朝集使五品以上合班六品以下位于横街南朝集使六品以下合班蕃客又于其南皆西面北上设武官五品以上位于横街北东面北上朝集使五品以上合班诸亲位于其下六品以下位于横街南朝集使六品以下蕃客等又于其南东面北上设典仪位于悬之东北赞者一人在南少退东面西向设举麾位于殿上西阶之西东面设使者受命位于横街南道东北面西上奉礼设门外位文官一品以下五品以上位于顺天门外道东每等异位重行西面武官三品以下位于门西每等异位俱重行东面以北为上未明二刻诸卫勒所部屯门布黄麾半仗入陈于殿庭如常仪群官依时刻集朝堂俱就次各服朝服侍中量时刻版奏请中严钺戟近仗就陈于合外太乐令以下师二人入就位请侍卫之官各服其器服侍中中书令以下诸侍臣俱诣合奉迎典仪帅赞者先入就位吏部兵部各赞群官出次典谒各引就门外位侍中版奏外办皇帝月袞冕出坐如常仪通事舍人引群官以次入就位立定典仪曰再拜赞者承传群官在位者皆再拜吏部与礼部侍郎赞使主副出典谒引就受命位侍中前承制降诣使者西北东面称有制使主副俱再拜侍中还侍位典谒引使主副出初使者将出典仪曰再拜赞者承传群官在位者皆再拜通事舍人引群官出侍中前跪奏称侍中臣某言礼毕俯伏兴

还侍位皇帝降座入自东房侍卫警蹕如来仪侍臣
从至合使主副乘辂备仪仗而行从者乘车以从
纳采

前一日主人设使者次于大门之外道右南向其日
大昕使者公服至于妃氏大门外掌次者延入次（
凡宾

主及行事者皆公服）

主人受其礼于庙

无庙者

受于正寝

掌事者布神

席于室户外之西莞筵纷纯加藻席画纯南向右雕
几使者出次谒者引立于大门外之西东面主人在
大门内西面宾者立于主人之左北面受命出立于
门东西面曰敢请事使者曰奉制作俚储宫允归令
德率由旧章使某纳采宾者入告主人曰臣某之女
不教若如人既蒙制访臣某不敢辞宾者出告掌畜
者以雁授使副进授使者退复位使者左手执之宾
者引主人迎于大门之南北面再拜使者不答拜谒
者引使者入门而左主人入门而右使者升自西阶
立于楹间俱南面西上主人升自东阶进使者前北
面使者曰某奉制纳采主人升诣阶间北面再拜稽
首升进北面受雁退立于东阶上西面使者降自西
阶以出

问名

使者既出立于门外之西东面初使者降左右受雁
于序端主人降立于内门东厢西面宾者进受命出
请事使者曰某将加卜筮奉制问名宾者入告主人
曰制以某之子备数于储宫臣某不敢辞宾者出告
掌畜者以雁授使副主人拜迎入俱升堂南面如纳
采仪使者曰某奉制问名将加诸卜筮主人降诣阶
间北面再拜稽首升进北面受雁少退仍北面曰臣
某第某女某氏出使者降自西阶出立于内门外之
西东面初使者降主人退于阼阶东左右受雁于序

端主人降立于内门东厢西面宾者进命出请事使者曰礼毕宾者入告主人曰某公为事故至于某之室某有先人之礼请礼从者

其仪与纳

后礼宾同

纳吉

前一日主人设使者次如常其日大昕使者至妃氏大门以下宾者出请事如纳采仪使者曰加诸卜筮占曰协从制使某也纳吉宾者入告主人曰臣某之女弗教惟恐不堪龟筮云吉臣某谨奉典制宾者出告掌畜者以雁授使副主人迎拜入俱升堂南面并如纳采仪主人降诣阶间北面再拜稽首升进北面受雁使者降自西阶立于大门外之西东面初使者降主人还阼阶东左右受雁于序端主人降立于内门西面宾者进受命出请事使者曰礼毕其宾使者皆如问名之仪

纳征

前一日主人设使者次如常仪其日大昕使者至妃氏大门外掌次者延入次执事者设布幕于内门之外元纁束帛陈于幕上乘马陈于幕南北首西上执事者奉谷珪以匱俟于幕东西面主人掌事者设几筵如常使者出次谒者引立于大门外之西东面主人立于大门内西面宾者进受命出请事使者曰制使某以玉帛乘马纳征宾者入告主人曰奉制赐臣以重礼臣某祇奉典制宾者出告又宾者引主人迎于大门外之南北面再拜使者不答拜谒者引使者入门而左主人入门而右至于内门外使者立于门西东面北上主人立于门东西面执事者坐启匱取珪于元纁上兴以授使副使副进授使者退复位使者受玉帛谒者引使者入门而左主人入门而右牵乘马者从入三分庭一在南首西上使者升自西阶立于楹间俱南面西上主人升自东阶进使者前北面使者曰某奉制纳征主人降阶间北面再拜稽首升进北面受玉帛使者降自西阶出立于内门外之

西东面初使者降主人还阼阶东左右受玉帛受马自左受之以东牵马者既授马自前西出宾者进受命出请事使者曰礼毕其宾使者如纳吉之仪

告期

前一日主人设次设几筵及宾者受命请事等并如纳采仪使者曰询于龟筮某月某日吉制使某告期其授雁升堂受命之仪一如纳采使者曰某奉制告期主人降诣阶间北面再拜以下礼毕以纳采宾从使者如纳征仪

告庙

有司以特牲告如常礼祝文临时撰

册妃

前一日主人设使者次如常仪设宫人次于使者西南俱东面障以行帟其日奉礼设使者位于大门外之西东向使副及内侍位于使者之南举册案及玺绶命服者在南差退俱东向设主人位于门南北面设使者以下及主人位于内门外仪皆如之设典内位于内门外主人南西面设宫人位于门外于使者之后俱重行东向以北为上障以行帟设赞者二人位于东阶东南西向典内先置一案于合外近限使主副朝服乘辂持节备仪仗鼓吹备而不作至妃氏大门外使者降辂掌次者延入次宫人等各之次掌严奉褕翟衣及首饰内厩尉进厌翟车于大门之外道之西东向以北为上诸卫率其属布妃仪仗如常使者出次典谒引使者以下持节者前导及宫人典内各就位持节者立于使者之北少退俱东向主人朝服出迎于大门外之东西面立定少顷北面再拜使者不答拜典谒引使者持节者前导入门而左持案以下从之主人入门而右至内门外各就位立定奉册宝案者进当使副前使副受册宝奉案者退复位使副以册宝进授使者退复位内侍进使者前西面受册宝东面授典内退复位典内持册宝立入于合外之西东面跪置册宝于案典内俯伏兴奉衣服及侍卫者从入皆立于典内之南俱东面北上傅

姆赞妃出引立于庭中北面掌书进跪取玉宝兴进立于妃前南向掌严奉首饰及褕翟与诸宫侍卫者次入侍卫如常典内还复位司则前赞妃再拜还侍位妃再拜司则进掌书前北面受册宝进妃前南向授妃妃受命以授司闺司则又前赞妃再拜还侍位妃又再拜讫司则前请妃升座还侍位司闺引妃升座南向座宫官以下俱降立于庭重行北向以西为上立定赞唱者曰再拜宫官以下皆再拜讫诸应侍位者各升立于侍位司则前启礼毕妃降座司闺引妃入室主人候使者如礼宾之仪使者乘辂而还临轩醮戒

前二日本司宣摄内外各供其职前一日卫尉设次于东朝堂之北西向又设宫官次于重明门外如常仪其日前三刻宫官俱集于次各至次各服其服诸卫各勒所部依图陈设左庶子赞请中严内仆进金辂于合外南向率一人执刀立于辂前北向前二刻诸卫之官各服其器服以次诸合奉迎

左庶子

负玺如式

宫

官应从者各出次立于门外文东武西重行相向北上左庶子奏外办太仆畜衣而升执辔皇太子着袞冕之服以出左右侍卫如常仪皇太子乃升仆立授绥车驱左庶子以下夹侍如常出门车权停令车左升辂陪乘宫臣上马讫皇太子车动鼓吹振作如式文武官皆乘马如常至承天门下车所回辂南向左庶子进当辂跪奏称左庶子臣某言请降辂俯伏兴还侍位皇太子降辂典谒引舍人舍人引皇太子就位侍卫如常仪前一日尚舍奉御整设御座于太极殿阼阶上西向卫尉设群官次于朝堂太乐令展宫悬于殿庭乘黄令陈车辂并如常仪其日尚舍直长铺皇太子席位于牖间南向

其席莞筵纷

纯嘉藻席绩纯

尚食奉

御设酒口于东序下有坵加勺设冪实爵一又陈脯一豆醢一在口西晡前三刻典仪设群官版位于内奉礼设版位于外如朝礼诸卫勒所部屯门布仗立仗入陈于殿庭群官依时刻集朝堂俱就次各服其服其侍中版奏请中严钺戟近仗就陈于合外太乐令帅工人入就位晡前三刻诸卫侍之官各服其器服侍中中书令以下俱诣合奉迎典仪帅赞者先入就次吏部兵部赞群官俱出次通事舍人各引就门外位侍中版奏外办皇帝服通天冠绛纱袍乘輿以出曲直华盖警蹕侍卫如常仪皇帝将出仗动皇帝出自西房即御座西向坐符宝郎奉宝置于御座如常通事舍人引群官以次入就位群官立定典仪曰再拜赞者承传群官在位者皆再拜初群官入讫典谒引舍人舍人引皇太子（

侍从如常式皇太子每行事在左庶子执仪赞相）

至悬南北面立典仪曰再拜赞者承传皇太子再拜典仪引舍人舍人引皇太子诣西阶皇太子脱舍人引升就席西南面立尚食奉御酌酒于序进诣皇太子西南东面立皇太子再拜受爵尚食直长又荐脯醢于席前皇太子升荐座右执爵右取脯糒于醢祭于豆之间右祭酒兴降席面南面坐啐酒奠爵再拜执爵兴奉御受虚爵直长彻荐还于房舍人引皇太子进当御座东面立皇帝命曰往迎尔相承我宗事勳帅以敬皇太子曰臣谨奉制旨遂再拜舍人引皇太子降自西阶纳讫典谒引舍人舍人引皇太子出门典仪曰再拜赞者承传群官在位者皆再拜通事舍人引群官以次出侍中前跪奏称侍中臣某言礼毕俯伏兴还侍位皇帝降座入自东房警蹕侍卫如来仪侍臣从至合

亲迎

前一日卫尉设皇太子次于妃氏大门之外道西南向设侍卫群官次于皇太子次西南东向北上皇太

子既受命遂适妃第执烛马前鼓吹振作如式侍从如常皇太子车至妃氏大门外次前回辂南向左庶子进当辂前跪奏称左庶子臣某言请降辂俯伏兴还侍位皇太子降辂之次车将至主人设几筵如常礼女如别仪妃服褕翟花钿立于东房侍从如常主妇衣礼衣钿钗立于房户外之西南向主人公服出立于大门之内西向

在庙则主人

以下着祭服

宾者公服立于主

人之左北向左庶子前跪奏称左庶子臣某言请就位俯伏兴还侍位皇太子出次立于门西东面侍卫警蹕如常宾者进受命出门东西面曰敢请事左庶子承传进跪奏如常皇太子曰以兹初婚某奉制承命左庶子俯伏兴传于宾者入告主人曰某谨敬具以顷宾者出传于左庶子奏如初宾者引主人迎于门外之东西面再拜左庶子前跪奏称左庶子臣某请答拜俯伏兴还侍位皇太子答再拜主人揖皇太子先入掌畜者以雁授左庶子进东南向奉授皇太子既授雁进入侍卫者量入侍从及内门主人让曰请皇太子入皇太子曰某弗敢先主人又曰固请皇太子入皇太子曰某固不敢先主人揖入皇太子从入皇太子入门而左主人入门而右内门主人揖入内溜将曲揖当阶揖皇太子皆报揖至于阶主人曰请皇太子升皇太子曰某敢辞主人曰固请皇太子升皇太子曰某固敢辞主人又曰终请皇太子升皇太子又曰某敢终辞主人揖皇太子报揖主人升立于阼阶上西面皇太子升进当房户前北面跪奠雁俯伏兴再拜降出主人不降送内厩尉进厌翟于内门外傅姆导妃司则前引出于姆左傅姆在右保姆在左

执烛及

侍从如式

父少进西面戒之必有正焉若衣若

笄命之曰戒之敬之夙夜毋违命母戒之西阶上施衿结帨命之曰勉之敬之夙夜毋违庶母及门内施鞶申之以父母之命命之曰恭敬听宗尔父母之言夙夜无愆视诸衿鞶妃既出内门至辂后皇太子授绥母辞不受曰未教不足与为礼妃升辂乘以几姆嘉憬皇太子驭轮三周驭者代之皇太子出大门乘辂还宫侍卫如来仪妃侍次于后主人使其属送妃以宾从

同牢

其日司闺设妃次于东合内道东南向掌筵铺褥席将夕司闺设皇太子幄于殿室西厢东向铺地重茵施屏障设同牢之席于室内皇太子之席西厢东向妃东厢西向

席皆莞筵纷

纯嘉藻席绩纯

席间量容牢饌典膳监

设洗于东阶东南东西东溜南北以堂深壘水在洗东筐在洗西南肆

筐实以

二巾二爵

设妃洗在东房筵北壘

水在洗西筐在洗东北肆皆加勺巾冪典膳监先饌

于房西牖下豆各二十簋簋各二钗各三瓦甗一

皆加巾冪盖俎三口在室内北牖下元酒在西加冪

勺南柄

冪夏用

纱冬用絺

口在房户外之东无元酒筐在南

实四爵合盃

其器皆乌漆

惟以陶盃以瓢

皇太子车至侍臣下马

所车权停文武侍臣皆下马车左降立于辂右车动

车右夹辂而趋车至左合回辂南向左庶子进当辂

前跪奏称左庶子臣某言请降辂俯伏兴还侍位皇太子降辂入俟于内殿门外之东西面侍卫如常仪左庶子以下皆退妃至宫门鹵簿仗卫停于门外近侍者从如常入至左合外回辂南向司则进当辂前启请妃降辂掌筵依式执扇前后执烛如常仪妃降辂就次整饰司闺引妃诣内殿门西东面皇太子揖妃以入又司闺前升自西阶妃后升执扇烛者陈于东西阶内皇太子执席东向立妃执席西向立司饌进诣阶间北面跪奏称司饌妾姓言请具牢饌兴司则承令曰诺司饌率其属升奉饌入设于皇太子及妃座前酱在席前俎醢在其北俎三入陈于豆东豕俎持于俎北

豆俎醢

在豕东

司饌设黍于酱东稷在东设湑

于酱南

饌在

西也

设对酱于东

对酱妇酱也

设之当特俎

俎醢在其南

北上设黍于豕俎北其西稷稻粱设湑于酱北司饌

启会于簠簋之南对簠簋于北

启发也豆

盖彻于房内

各加匕

箸于设讫司饌北面跪奏饌具兴皇太子及妃俱坐

司饌跪取脯糒于醢取韭俎糒醢授皇太子又司饌

取脯糒于醢取韭俎糒醢授妃皇太子及妃受俱祭

于豆之间司饌兴取黍实于左手口取稷于右手

授皇太子又司饌取黍实于左手口取稷于右手授

妃皇太子及妃各受祭于俎醢之间司饌俱兴各立

取肺皆绝末跪授皇太子及妃俱受又祭于俎醢之

间司饌俱以肺加于俎掌严授皇太子巾又掌严授妃巾皇太子及妃皆帨手以栖极上铍口糯之祭于上豆之间司饌品尝皇太子饌又司饌品尝妃饌司饌各移黍置于席上以次跪授肺脊皇太子及妃皆食以滫酱三饭卒食司饌北面跪奏称司饌妾姓言请进酒司则承令曰依奏兴司饌北面俱盥手洗爵于房入室诣酒口所酌酒进北面立皇太子及妃俱再拜兴一人进授爵皇太子一人以爵授妃皇太子及妃俱受爵司饌俱退北面答再拜皇太子及妃俱坐皇太子及妃俱祭酒司饌各以肝从司则俱进受虚爵奠于筐司饌又俱洗爵酌酒再醕皇太子及妃俱受爵俱饮司则进受虚酌奠于筐三醕用盃如礼再拜皇太子及妃立于席后司则降东阶洗爵升酌于户外口进北面俱奠爵兴再拜皇太子及妃俱答拜司则俱坐取爵祭酒遂饮卒爵奠爵遂拜执爵降奠爵于筐还侍位司饌北面奏称司饌妾姓言牢饌毕司则承令曰诺司饌彻饌设于房司则前跪奏称司则妾姓言请殿下入俯伏兴还侍位皇太子入于东房释冕服着口褶司则启妃入帟幄皇太子及妃俱入室媵馐皇太子之饌御馐妃之饌

妃朝见

其日昼漏上水一刻所司列御座于所御殿阼阶上西面

其席莞筵纷纯嘉藻席

画纯次席黼纯左右玉几

司设司皇后座于室

户外之西近北南向尚食帅司膳设酒口于房内东壁下有坵加勺冪

口用瓦纪实

以醴酒

一豆一实以醢脯设

于口北又设洗于东房近北盥水在洗西筐在东北肆

筐实以巾冪

觶一角栖一

其日夙兴妃沐浴司则启请妃内严

质明诸卫帅其属陈布仪仗如常仪近仗入陈于寝门外内厩尉进厌翟于正寝西阶之前南向司则启外办妃服褕翟加首饰以出降自西阶升辂侍卫如常至降车所司则赞妃降辂司言引妃入仗卫停于合外障扇侍从如常妃至寝门之外立于西厢东面诸卫勒所部屯门布仗三仗入陈于所御殿合外如常侍中奏请皇后内严妃既至寝门侍中版奏外办皇帝服通天冠绛纱袍以出升自阼阶即御座西向坐侍卫如常仪尚仪又奏皇后外办皇后祔衣首饰司言引尚宫尚宫引皇后出即御座南向坐侍从如常妃奉筭枣栗司饌又执奉筭殿修以从司则引妃入立于庭北再拜司宾引妃升自西阶进东面跪奠筭于御座前皇帝抚之尚食进彻以东司言引妃自西阶降复北面位奉筭殿修再拜司言引妃升进北面跪奠筭于皇后座前皇后抚之尚食进彻以东司言引妃退立于西序东面又再拜司设设妃席于户牖之间近北面南向司言引妃立于席西南向尚食又入东房盥手洗觶酌醴齐加栖面柄出进诣妃席前北面立妃进东面再拜受醴尚食荐脯醢于席妃升席坐左手执觶右取脯糒于醢祭于豆之间以栖祭醴三始极一祭又极再祭降席进东面跪取觶兴即位席坐奠觶于荐东兴降席司宾引妃降自西阶出合乘车还宫障扇侍从如来仪

会群臣

皇帝会群臣于太极殿如正至之仪唯上寿辞云皇太子嘉聘礼成克崇景福臣某等不胜庆抃谨上千秋万岁寿

开元二十一年皇太子纳妃薛氏

按唐书元宗本纪开元二十一年五月戊子以皇太子纳妃降死罪流以下原之

按旧唐书元宗本纪开元二十一年皇太子纳妃制天下死罪降从流流以下放释京文武官赐勋一转

辽

圣宗太平八年皇太子纳妃诏诸族备会亲之帐

按辽史圣宗本纪太平八年六月癸巳权北院大王耶律郑留奏今岁十一月皇太子纳妃诸族备会亲之帐诏以豪盛者三十户给其费十一月丙申皇太子纳妃萧氏

宋

徽宗政和三年议礼局上皇太子妃卤簿及车舆之制

按宋史徽宗本纪不载 按仪卫志皇太子妃卤簿之制政和三年议礼局上清道率府校尉六人骑次青衣十人次导客舍人四人内给使六十人偏扇团扇方扇各十八

并宫

人执

行障四坐障二夹车

宫

人执

典内

二人骑厌翟车驾三马驾士十四人次合帅二人领内给使十八人夹车六柱二扇内给使执次供奉内人乘犊车次伞一正道雉尾扇二团扇四曲盖二（执伞

扇各内给使二人）

次给九十宋制臣子无卤簿名遇升储则

草具仪注政和礼虽创具卤簿然未及行也南渡后虽尝讨论然皇太子皆冲挹不受朝谒宫庙及陪祀及常朝皆乘马止以宫僚导从有伞扇而无围子用三接青罗伞一紫罗障扇四人从指使二人直省官二人客司四人亲事官二十人辇官二十人翰林司四人仪鸾司四人厨子六人教骏四人背印二人步军司宣效一十人步司兵级七十八人防警兵士四人朝位在三公上扈从在驾后方围子内 皇太子妃政和亦有卤簿南渡后亦省之妃出入惟乘檐子

三接青罗伞一黄红罗障扇四人从以皇太子府亲事官充辇官前执从物檐子前小殿侍一人抱涂金香球先驱则教骏兵士呵止 按輿服志皇太子妃则有厌翟车驾以三马出入亦乘檐子中兴简俭惟用藤檐子顶梁舁杠皆饰以元漆四角刻兽形素藤织花为面如政和之制

政和六年秋七月癸未皇太子纳妃朱氏

按宋史徽宗本纪云云 按礼志政和五年三月诏选皇太子妃六年六月诏选少傅恩平郡王朱伯材女为皇太子妃命所司备礼册命庚辰帝服通天冠绛纱袍御文德殿发册先是议礼局上五礼新仪皇太子纳妃乘金辂亲迎皇太子三奏辞乘辂及临轩册命诏免乘辂而发册如礼焉

高宗绍兴九年增定太子妃首饰龙凤冠及博鬓冠之制

按宋史高宗本纪不载 按輿服志皇太子妃首饰花九株小花同并两博鬓褕翟青织为摇翟之形青质五色九等素纱中单黼领罗縠褙皆以朱色蔽膝随裳色以緞为领缘以摇翟为章二等大带随衣色不朱里紕其外上以朱锦下以绿锦纽约用青组革带以青衣之白玉双佩纯朱双大绶章采尺寸与皇子同受册朝会之鞠衣黄罗为之蔽膝大带革带随衣色余与褕翟同唯无翟从蚕服之中兴仍旧制其龙凤花钗冠大小花二十四株应乘輿冠梁之数博鬓冠饰同皇太后皇后服之绍兴九年所定也 孝宗干道元年九月乙卯立广国夫人钱氏为皇太子妃

按宋史章宗本纪云云

干道七年三月丙子立恭王夫人李氏为皇太子妃 按宋史孝宗本纪云云 按輿服志花钗冠小大花十八株应皇太子冠梁之数施两博鬓去龙凤皇太子妃服之干道七年所定也其服后惟备祔衣礼衣妃备褕翟凡三等其当服后妃大袖生色领长裙霞帔玉坠子背子生色领皆用绛罗盖与臣下不异

理宗景定二年册永嘉郡夫人全氏为皇太子妃
按宋史理宗本纪景定二年冬十月甲寅皇太子择配帝诏其母族全昭孙之女择日入见宝佑中昭孙没于王事全氏见上上曰尔父死可念对曰臣妾父固可念淮湖百姓尤可念上曰即此语可母天下十一月癸未封全氏永嘉郡夫人十二月辛卯宰臣奏太子语臣等言近奉圣训夫妇之道王化之基男女正位天地大义平日所讲修身齐家之道当真履实践勿为口耳之学请宣付史馆永为世程法从之癸卯册永嘉郡夫人全氏为皇太子妃

明

太祖洪武 年定命妇朝贺东宫妃之仪
按明会典东宫妃正旦冬至命妇朝贺仪洪武间定前期女官陈设东宫妃座于宫中南向至日清晨内官陈设仪仗于丹陛之东西及丹墀之东西赞礼女官设外命妇班位于丹墀重行北向设赞礼位于丹墀之东西设引礼二人位于外命妇班之北东西相向设内赞女官二人位于宫内之东西外命妇既至宫门引礼引命妇入就拜位侍卫者侍班如常仪尚仪入阁启东宫妃服礼服以出侍从如常仪乐作升座乐止赞礼赞班齐乐作赞四拜外命妇皆四拜乐止引礼引班首由西阶升乐作自西门入进当座前北向立定乐止内赞赞跪班首跪质礼赞跪外命妇皆跪班首致辞云某国夫人妾某氏等兹遇（履端之节履长之节）

敬诣皇太子妃殿下称贺内赞唱兴外命妇皆兴引礼引班首由西门出复至拜位赞礼赞四拜外命妇皆四拜平身乐止尚仪启礼毕皇太子妃兴乐作还宫乐止引礼引外命妇以次出

洪武三年定皇太子妃礼服与皇妃同惟常服异其制

按明会典皇太子妃礼服洪武三年定与皇妃同常服犀冠刻以花凤首饰钏镯用金玉珠宝翠诸色团

领衫金绣鸾凤惟不用黄带用金玉犀

洪武四年四月戊申册开平忠武王常遇春女为皇太子妃

按大政纪云云

成祖永乐二年三月甲戌册长子妃张氏为皇太子妃

按大政纪云云

按明会典永乐二年定前一日内官设节册案于东宫内殿设香案于其南女乐于内殿设仪仗如常仪设内赞引礼女官各二人至日正副使等官持节捧册至左顺门以节册授内官入行礼北向立俟报内官持节册由正门入将至内引礼请皇太子妃具礼服宫人执扇从卫引赞导妃降自东阶出迎于宫门外比至皇太子妃随至拜位内官置节册于案内赞赞四拜赞宣册赞跪女官捧册立宣于皇太子妃之左宣毕内赞赞受册赞搢圭女官取册授皇太子妃皇太子妃受讫以授女官女官跪受于皇太子妃之右内赞赞出圭赞兴赞四拜礼内官持节出皇太子妃送出宫门外内官报正副使礼毕正副使复命皇太子妃乃具礼服诣奉先殿行谒告礼如常仪礼毕女官导诣宫门俟上具皮弁服皇后燕居冠服升座女官导妃就内殿行八拜礼毕出

永乐三年更定太子妃礼服常服之制

按明会典皇太子妃冠服礼服永乐三年定九翬四凤冠漆竹丝为圆匡冒以翡翠上饰翠翬九金凤四皆口衔珠滴珠翠云四十片大珠花九树皆牡丹花每树花一半开一蕊头二个翠叶九叶小珠花如大珠花之数皆穰花飘枝每枝花一半开一翠叶五叶双博鬓左右共四扇饰以鸾凤皆垂珠滴翠口圈一副上饰珠宝钿花九翠钿如其数托里金口圈一副 珠翠面花五事珠排环一对珠皂罗额子一描金凤文用珠二十一颗 翟衣深青为质织翟文九等凡一百三十八对间以小轮花红领襖裾织金云凤文绉丝纱罗随用 中单玉色纱为之

红领褙裾领织黻文十一或用线罗 蔽膝随衣
色织翟为章二等间以小轮花三以緞为领缘织金
云凤文纒丝纱罗随用 玉穀圭长七寸剡其上琢
谷文以锦约其下并韜 玉革带青绮口描金云凤
文玉事件十金事件四 大带表里俱青红相半其
末纯红而下垂织金云凤文上以朱缘下以绿缘并
青绮副带一 绶四采赤白缥绿纒质皆织成间施
二玉环小绶三色同大绶 玉佩二珩以下琢饰云
凤文描金上有金钩以小绶四采副之四采赤白缥
绿纒质织成 青□□以青线罗为之用青绮
饰以描金云凤文皂线纯每首加珠三颗常服永
乐三年定燕居冠以皂穀为之附以翠博山上饰宝
珠一座翊以三珠翠凤皆口衔珠滴前后珠牡丹花
二蕊头八个翠叶三十六叶珠翠穰花鬓二珠
翠云十六片翠口圈一副金宝钿花九上饰珠九颗
金凤一对口衔珠结双博鬓左右共四扇饰以鸾凤
金宝钿十八边垂珠滴金簪一对珊瑚凤冠髻一副
大衫霞帔衫用红色纒丝纱罗随用霞帔深青为
质织金或绣或铺翠圈金饰以珠纒丝纱罗随用玉
坠子琢凤文 四袄子即褙子桃红色金绣团凤
文纒丝纱罗随用 鞠衣青色胸背鸾凤云文用织
金或绣或加铺翠圈金饰以珠或素除黄外余色并
纒丝纱罗随用 大带青线罗为之有缘余或红或
绿各随鞠衣色 缘袄子青色红领褙裾织金
采色云凤文纒丝纱罗随用 缘裙红色绿缘
织金采色花凤文纒丝纱罗随用 玉带青绮口描
金云凤文玉事件十金事件三玉花采结绶以红绿
线罗为结上有玉绶花一琢云凤文绶带上玉坠珠
六颗并金垂头花瓣四片小金叶六个红线罗系带
一 白玉云样玳瑁二如佩制每事上有金钩一金
如意云盖一件两面钹云凤文下悬红组五贯金方
心云板一件两面亦钹云凤文俱衬以红绮下垂金
长头花四件中有小金钟一个末缀白玉云朵五
青□与前翟衣内制同

永乐二十二年更定太子妃册立仪

按明会典永乐二十二年册立乐设而不作节册至引赞赞妃就拜位宣册受册毕行四拜礼奉先殿谒告毕诣几筵行谒告礼如常仪皇帝皇后前谢恩礼毕诣皇妃前行四拜礼回宫诣皇太子前行四拜礼毕导升座侍卫如常仪王妃公主郡主及宫人女官应贺者于丹墀内行四拜礼毕各退

宪宗成化二十三年定皇太子纳妃仪

按明会典成化二十三年定皇太子纳妃仪

纳采问名

前期择日遣官告太庙牲用犊各一用祝文至期前一日所司设御座于奉天殿鸿臚设制案节案于御座前内官监礼部陈礼物于文楼下教坊司设中和乐于殿内至日清晨锦衣卫设卤簿于丹陛丹墀礼部设采輿教坊司设大乐俱于奉天门外上具袞冕御华盖殿鸿臚寺奏执事官行叩头礼请升殿导驾奉引如常仪上御奉天殿文武官朝服叩头讫执事官引正副使朝服就拜位行四拜礼传制官奏传制讫由左门出执事官举制案节案亦由左门出伞盖遮护置丹墀中道传制官宣制曰兹择某官某女为皇太子妃命卿等持节行纳采问名礼正副使又行四拜礼鸿臚寺奏礼毕上兴引礼引制案节案由奉天门左门出执事官引文楼下礼物随出至奉天门外正副使取节制书置采輿中仪仗大乐前导从二门行出东长安门外正副使易吉服乘马随行诣皇太子妃家行礼皇太子妃家前一日设正副使幕次于大门外道左南向设香案于正堂中设制案节案于香案南别设案于香案之北其日正副使至大门外仪仗大乐分列置采輿于正中设制案节案于采輿北引礼引正副使入幕次执事官陈礼物于正堂正副使至幕次取节制书置案上礼官一员先入正堂立于东主婚者朝服出见立于西礼官曰奉制聘皇太子妃遣使行纳采问名礼引礼引主婚者出迎引礼引正副使捧节及制书先行主婚者随行至正

堂置节及制书于案正使立于案左副使立于案右引礼引主婚者就拜位行四拜礼诣案前跪正使取纳采制宣讫授主婚者主婚者受之授执事者置于北案上稍左副使取问名制宣讫授主婚者主婚者受之授执事者置于北案上稍右主婚者俯伏兴平身执事者举答问名表案于主婚者后少西取表授主婚者主婚者受表跪授正使正使置表于案主婚者俯伏兴平身退就拜位又行四拜礼毕正副使出置表采舆中讫主婚者至正副使前致词云请礼从者酒馔毕主婚者奉币以劳正副使正副使出主婚者送至大门外正副使进发采舆于东长安门入至奉天门外以节表授司礼监官奏闻复命

纳采问名礼物

元纁纁丝二匹元一匹纁一匹用红绿罗销金束子六个 金六十两珍珠十两用红绿纱销金袋二个

花银六百两各色纁丝四十匹用红绿罗销金束子一百二十个 里绢四十匹大红罗四匹用红绿罗销金束子十二个 生纱四匹用红绿罗销金束子十二个 绵胭脂一百个金花胭脂二两用抹金合一对计六两重 铅粉二十袋计一十两重用红绿罗销金袋两个 北羊六牵用红绿销金盖袱六条并牵羊红麻索六条 猪四口鹅二十八只酒一百二十瓶用红绿罗销金小盖袱一百二十条每条坠角铜钱四个 圆饼一百二十个用红纸花贴面

末茶一十二袋用红绿罗销金袋一十二个 枣二合栗二合胡桃二合木弹二合白熟米四石作八合每合上用染红米二升 六十袋用红纸花贴面

媒人纁丝二匹用红绿罗销金束子六个里绢二匹 开合纁丝二匹用红绿罗销金束子六个里绢二匹珠翠花一朵 以上礼物媒人并内官一员送至妃家媒人就引妃家回奉礼物从东华门入如命官则皇帝前复命外命妇则皇后前复命

纳征告期册封

先期一日遣官告太庙所司设制案节案册案妃冠

服礼物中和乐至日清晨设鹵簿采輿大乐传制遣使礼仪并同前纳采问名仪但设妃仪仗车辂于左顺门外候礼物过随行又改制词云兹择某官某女为皇太子妃命卿等持节行纳征告期册封礼皇太子妃家前一日设正副使幕次香案制案节案册案玉帛案并同前受纳采问名仪但纳征用元纁束帛谷圭八马等物其日正副使至皇太子妃家于采輿中取节制书册玉帛置于案少候执事先设皇太子妃冠服诸礼物于正堂八马陈于堂下礼官一员先入正堂主婚者朝服出见礼官曰奉制封皇太子妃遣使行纳征告期册封礼主婚者出迎执事举玉帛册案前行正使于案取节及纳征制书副使取告期制书捧之以次行主婚者后随至正堂正副使各以节制书置于案退立于案之左右东西向置玉帛册案于制书案之南引礼引主婚者就拜位行四拜礼引诣案前跪正使取纳征制书宣讫授主婚者主婚者受之以授执事者执事者跪受置于北案正使捧圭授主婚者主婚者受之以授执事者执事者跪受置于北案副使捧纁授主婚者主婚者受之以授执事者置于北案毕副使取告期制书宣讫授主婚者主婚者受之以授执事者置于北案主婚者俯伏兴平身复位行四拜礼毕正副使入次少候女官捧皇太子妃首饰冠服入中堂左内官陈仪仗车辂等物于大门之内女官以首饰冠服进皇太子妃内官进皇太子妃仪仗于中堂前司礼监官进前受节册正副使于案取节册授之仍前立候内官二人引捧节册监官入中堂前各置于案皇太子妃具服出合女官及宫人拥护诣香案前向阙立赞礼女官赞行四拜礼赞宣册赞跪皇太子妃跪宣册女官取册立宣于妃左讫赞受册赞搢圭宣册官以册进授皇太子妃妃受册以授女官女官跪受于右立于西赞出圭兴四拜礼毕皇太子妃入合持节监官由正门出授正副使报受册礼毕正副使出大门外置节采輿中主婚者请礼从者及以币劳正副使正副使还至奉

天门外以节授司礼监官捧入复命

纳征礼物

玉谷圭一枝裹玉圭锦袋二件盛玉圭钺金云凤朱
红木匣一个内锦褥一片 元纁纁丝四匹元二匹
纁二匹用红绿罗销金束子一十二个 珠翠燕居
冠一顶冠盃金冠上大珠博鬓结子等项全金凤二
个金宝钿花二十七个金簪一对冠上珊瑚凤冠髻
一副 大衫素夹三件大红纁丝一件大红线罗一
件大红银丝纱一件 燕居服四件大红纁丝一件
大红线罗一件青线罗一件大红素纱一件 大带
四条内大红线罗三条青线罗一条 玉革带一条
玉事件九件金事件三件 玉花采结绶一副红绿
线罗采结大红线罗系带采结上玉绶花一个绶带
上玉坠珠六颗绶带上金垂头花板四片金叶儿六
个 白玉钩碾凤文佩一副玉事件二十件串珠全
金钩二个 红罗销金夹袂大小五条包燕居及玉
革带等用 珠翠面花四副珠翠花四枝金脚八钱
重 金脚四珠环一双金脚五钱重 梅花环一双
金脚五钱重 金钹花钏一双二十两重 金光素
钏一双二十两重 金龙头连珠镯一双一十四两
重 金八宝镯一双八两重外宝石一十四块 金
二百两九成色一百两八成色一百两 花银一千
两珍珠十六两用红绿纱销金袋二个 宝钞四千
贯乘马八匹红笼头锦鞞八副 各色纁丝六十匹
用红绿罗销金束子一百八十个 各色绫六十匹
用红绿罗销金束子一百八十个 各色纱六十匹
用红绿罗销金束子一百八十个 各色罗六十匹
用红绿罗销金束子一百八十个 各色锦四十段
用红绿罗销金束子一百二十个 大红罗六匹用
红绿罗销金束子一十八个 生纱六匹用红绿罗
销金束子一十八个 各色绢三百匹白绵二十八
斤各色衣服五十三件纁丝十八件罗十七件纱八
件绫十件 各色被六□锦二□纁丝二□绫二□
白绢卧单四条朱红钺金皮箱十五对朱红漆柳

箱二对胭脂二合二两重金合一对一十两重 铅粉二十袋一十两重用红绿罗销金袋二个 北羊四十牵用红绿罗销金盖袱四十个牵羊红麻索四十条 猪二十口鹅四十只酒二百四十瓶用红绿罗销金盖袱二百四十条每条坠角折二铜钱四个

末茶四十袋用红绿罗销金袋四十个 响糖二合芝麻缠糖二合茶缠糖二合砂仁缠糖二合胡桃缠糖二合木弹二合蜜煎二合枣子二合干葡萄二合胡桃二合圆饼六百个用红纸花贴面 白一百二十袋用红纸花贴面 红纱罩盃大小一十二个 开合绞丝八匹用红绿罗销金束子二十四个 红绢八匹珠翠花一朵 媒人绞丝一十二匹用红绿罗销金束子三十六个

发册礼物

金册一副两叶计足色金一百两重每叶高一尺二寸阔五寸周尺籍册锦一片红绢里联贯册叶用红丝垫册锦褥一个红绢里裹册红罗销金小夹袱一条浑金沥粉云凤册盃一个内用红绞丝发衬花银钉铰一副一两二钱重嵌金丝铁锁钥一副覆盃红罗销金大夹袱一条 九翬四凤冠一项首饰一副冠上大花九树小花九树宝钿九个翠云博鬓描金珠皂罗额珠眉心珠牌环金冠上金凤四个牌环脚一双 翟衣三套描金云凤沈香色木匣一个铜锁钥索扛全青绞纱绣翟衣一件青绞丝绣蔽膝一件玉色线罗中单一件红缘 青线罗绣翟衣一件青线罗绣蔽膝一件玉色线罗中单一件红缘

青纱绣翟衣一件青纱绣蔽膝一件玉色纱中单一件 霞帔三副青红线罗销金大带一条上有青绞丝副带一条五色线锦绶一副上有玉环二个青红罗采结全 白玉钩碾凤文佩一副玉事件二十件串珠全金钩子并圈二个五色线锦衬一副 白玉革带一副青绞丝裹口描金文翟文玉事件一十件金事件五件 青绞丝一双上有珠六颗 青罗口一双红罗销金夹袱大小五条包裹翟衣玉佩

玉带等用 凤轿一乘锦坐褥一个锦踏褥一个红交口一把红穿绦全红帘一扇青罗销金沿边绣带全红罗销金轿衣一件沥水顶罩全采结四串抹金银香圆宝盖四副计八件共花银一十六两 红油绢销金雨轿衣一件沥水顶罩全

仪仗

红杖二清道旗二绛引旛二戟斨二弋绣旛二绣旛二班剑二结子绢袋全仪刀二结子红绢袋全吾杖二绢袋全鐙杖二绢袋全立瓜二绢袋全卧瓜二绢袋全骨朵二绢袋全斧二响节四绢袋全红绣伞一把绢袋全青方伞二把绢袋襕全红绣团扇四把绢袋全青绣团扇四把绢袋全红纱灯笼四个竿全拂子二结子全坐障一竿全行障二竿全抹金交椅脚踏一副除木外计花银一百两重搭坐踏褥结子全抹金银水罐一个六十两重抹金银水盆一个六十两重抹金银唾壶一个一十六两重抹金银唾盂一个一十六两重抹金银香炉一个一十六两重抹金银香合一个一十六两重

擎执宫人销金罗袍一十四领抹金钹花银带一十四条翠花纱帽一十四顶皂麂皮靴一十四双女轿夫衣袍一十六领汗口一十六副铜束带一十六条花纱帽一十六顶红锦布口一十六双

催妆礼物

北羊四牵红绿绢销金盖袱四条酒四十瓶红绿罗销金盖瓶袱四十条每条坠角折二铜钱四个果四合用花八枝以上礼物内官二员送至妃家

醮戒

先期一日所司设皇太子幕次于中左门前丹墀内设皇太子受醮戒位于御座南北向设皇太子拜位于丹陛上北向设赞礼二人位于皇太子丹陛上拜位之北东西相向知班二人位于赞礼之南东西相向设酒馔案于醮戒位之东稍北设司爵司饌各二人位于案之南南向执膳内官先备金爵果合以候是日早鸿胪寺赞引二人具朝服并东宫侍从官先

入至文华殿门前候皇太子出行叩头礼赞引二人及侍从官导从由奉天左门入至幕次具袞冕以候鼓三严上服通天冠绛纱袍出鸿胪寺请升座上御奉天殿乐作警蹕文武官盛服行叩头礼分班列侍如常仪乐止赞引及侍从官导引皇太子出幕次至东陛下侍从官止赞引导引皇太子由东阶升至丹陛拜位北向立赞礼赞鞠躬四拜兴平身赞引导引皇太子由奉天殿左门入就醮戒位北向立司爵斟酒以进赞引赞跪皇太子跪赞搢圭赞受爵司爵者以爵立授皇太子皇太子啐酒讫以爵授内使内使跪受爵退置于案司饌者以果合跪进皇太子皇太子取少许食讫司饌者兴以果合退置于案赞出圭赞恭听戒命上命之曰往迎尔相承我宗事勛帅以敬皇太子曰臣谨受命赞俯伏兴平身赞复位赞引仍导由左门出至丹陛上拜位立定赞礼赞鞠躬四拜兴平身赞礼毕乐作警蹕上降座还宫乐止赞引导皇太子由东陛降丹墀东宫内外官皆导从由奉天左门出午门外幕次易服

妃受醮戒

亲迎日妃家先于祠堂陈设祭物妃服燕居冠服妃父母率妃诣祖宗前行礼奠酒读祝礼毕执事者具酒饌于内进妃饮食讫父母坐于正堂女执事引妃诣父母前各四拜父命之曰尔往大内夙夜勤慎孝敬毋违母命之曰尔父有训尔当敬承妃听受讫次诣诸尊长行礼毕改服翟衣以俟

亲迎

是日早先设皇太子幕次及仪仗奠雁并所乘辂教坊司大乐及随侍官舍侍卫官军俱于午门外妃家先设皇太子幕次于中门之外南向设香案奠雁案于中堂皇太子受醮戒讫赞引导引至午门外幕次易皮弁服讫赞引跪请升辂皇太子升辂执雁者后随乐作仪从先导随侍官舍官军导从由东长安门至妃家门外赞引跪请皇太子降辂导引至幕次礼官一员先入至正厅立于东西向主婚者具朝服出

见立于西东向礼官曰皇太子奉制行亲迎礼引礼二人具服引主婚者迎皇太子于幕次之外内官二员具服引皇太子出幕次主婚者请皇太子入中堂皇太子先行内官具服捧雁随入主婚者后行至中堂主婚者进立于堂中之左妃母立于堂中之右东西相向皇太子至中堂女执事二人引妃出房立于妃母之下内官引皇太子至案前内官捧雁跪进皇太子皇太子以雁奠于案内官引皇太子稍退近东西向立主婚者诣雁案前行八拜礼退复位执事者彻案引礼内官导皇太子先行至中门女轿夫举凤轿至于中门之内内官具妃仪仗于中门之外女执事引妃出内官跪请皇太子诣轿所启请揭帘妃升轿内官启请皇太子升辂前行妃具仪仗从后行由东长安门进至午门外车驾仪仗侍卫官舍官军俱止妃仪仗入左顺门内候内官跪请皇太子降辂导引入幕次候妃至轿止内官跪请皇太子揭帘妃降轿皇太子先行内执事以帷幕拥护妃后行俱步入左顺门内官跪请皇太子乘舆先行女官跪请皇太子妃升轿后行至宫门外皇太子降舆候妃至女官跪启请皇太子妃降轿入幕次候行合卺礼

亲迎礼物

活雁一对

合卺

其日内官先于皇太子内殿外设妃幕次设皇太子座于殿东西向设妃座于西东向各设拜位于座之南设酒案于正中稍南置两爵两盃于案上皇太子至宫门外降舆入候于内殿门外之东西向妃降轿女官以帷幕拥护导引入幕次整饰讫导引至内殿门西东向赞引二人导皇太子前升殿女官二人导妃随升赞请就拜位皇太子与妃各就拜位赞皇太子两拜妃四拜赞请升座皇太子与妃皆升座女执事二人举饌案进于皇太子及妃之前女官司尊者取金爵酌酒以进皇太子与妃各受爵饮讫女官进饌皇太子与妃皆举饌讫女官再以金爵进酒皇太

子与妃饮讫女官进饌皆举饌讫女官再以盞酌酒合和以进皇太子与妃皆饮讫又进饌皇太子与妃皆举饌凡三举酒饌毕执事者彻饌案赞皇太子与妃兴就拜位相向赞两拜如前仪毕皇太子从者俊妃之饌妃从者俊皇太子之饌皇太子从者导皇太子入宫更衣妃从者及女官导妃入宫易常服供用器皿

金器壶瓶一对六十两重酒注一对六十两重孟子一对二十两重贄礼盘二面六十两重盘盞二副二十两重托里胡桃木口四个六十四两重楞边胡桃木托四个五两重托里胡桃木锤子一对一十一两重撒盞一对八两重葫芦盘盞一副一十两重茶匙一双一两重匙一双五两重箸二双五两重

银器壶瓶二把共五十两重果合一对一百六十两重汁瓶二把共五十两重茶瓶一对五十两重汤鼓四个八十两重案酒櫟一十二个四十二两重果櫟一十二个三十两重茶櫟一十二个二十四两重

朝见两宫

第二日清晨皇太子冕服妃翟衣女官赞引各启请出宫至某宫门外俟某宫服燕居服升座赞引引皇太子及妃自左门入皇太子先入妃从之赞礼赞诣某宫前皇太子立于东妃立于西宫人以殿修盘立于妃之右赞皇太子与妃皆四拜执事二人举案至某宫前宫人以殿修盘授妃妃捧盘置于案执事者举案妃随案进至某宫前妃复位赞皇太子与妃皆四拜兴执事者彻殿修案于东赞礼毕引皇太子与妃出诣上位宫前俟上位具常服升座赞引引皇太子及妃自左门入诣上位前进枣栗盘行礼同前毕诣皇后宫进殿修盘行礼同前毕赞引引皇太子及妃出是日赐皇太子与妃宴

盥饌

第三日清晨妃服翟衣赞引引妃至某宫由左门入俟膳至赞引引妃至前赞四拜尚食以膳授妃妃捧膳置于案复位又赞四拜礼赞引引妃退立于西南

俟膳毕引妃出升轿诣干清宫门外降轿由左门入
俟膳至赞引引妃诣上位前并皇后前礼俱同
庙见

第四日内官于奉先殿陈设牲醴祝帛赞引二人引
皇太子二人引妃至奉先殿诣德祖元皇帝皇后神
御之前赞皇太子与妃皆两拜赞跪皇太子跪妃亦
跪赞搢圭皇太子搢圭赞进帛执事者跪进于皇太
子右赞献帛皇太子受帛以献授执事者赞奠帛执
事者以帛奠于神御前赞进爵执事官以爵跪进于
右赞献爵皇太子受爵以献授执事者赞奠爵执事
者以爵奠于神御前赞俯伏兴皇太子俯伏兴妃亦
兴赞复位赞皇太子与妃皆两拜平身次诣各神御
礼同前赞诣读祝位皇太子与妃诣读祝位赞跪皇
太子跪妃亦跪读祝讫赞俯伏兴平身皇太子俯伏
兴平身妃亦兴赞复位赞皇太子与妃皆两拜平身
赞执事者捧祝帛各诣燎所赞诣燎位赞礼毕引礼
引皇太子及妃还宫

庆贺

是日早上具皮弁服御华盖殿执事官引礼奏请升
殿导驾乐作陈设如常仪文武百官具朝服先行四
拜礼鸿胪寺官诣丹陛上跪致词曰某官臣某等恭
惟皇太子嘉礼既成益绵宗社隆长之福臣某等不
胜忻忭之至谨当庆贺又四拜礼毕上起易服宴群
臣如冬至正旦之仪其日命妇庆贺皇太后行礼致
词如前但致词前称某夫人妾某氏等末称妾某氏
等礼毕庆皇后礼同前但改致词曰皇太子嘉聘礼
成益绵景福余并同礼毕皇太后赐宴

神宗万历三十三年封皇太子正宫为妃余皆才人
按明通纪万历三十三年十一月十四日皇太子第
一子生上喜得元孙谕礼封皇太子正宫为妃余皆
才人

东宫妃嫔部总论

太平御览

太子妃

白虎通云妃者匹也妃匹者何谓也相与偶焉古者天子后宫嫡庶皆曰妃史记曰黄帝有四妃帝尝有四妃虞舜有二妃周以天子之正嫡为王后秦称皇帝因称皇后以太子之正嫡称妃汉因之汉书外戚传太子妃有良娣有孺子妻妾凡三等是也魏晋以后咸遵之

东宫妃嫔部列传

汉

史良娣

按汉书后妃传卫太子史良娣宣帝祖母也太子有妃有良娣有孺子妻妾凡三等子皆称皇孙史良娣家本鲁国有母贞君兄恭以元鼎四年入为良娣生男进号史皇孙武帝末巫蛊事起卫太子及良娣史皇孙皆遭害史皇孙有一男号皇曾孙时生数月犹坐太子系狱积五岁乃遭赦治狱使者邴吉怜皇曾孙无所归载以付史恭恭母贞君年老见孙孤甚哀之自养视焉后曾孙收养于掖庭遂登至尊位是为宣帝而贞君及恭已死恭三子皆以旧恩封长子高为乐陵侯曾为将陵侯元为平台侯及高子丹以功德封武阳侯侯者凡四人高至大司马车骑将军丹左将军自有传

晋

愍怀太子妃王氏

按晋书烈女传愍怀太子妃王氏太尉衍女也字惠风贞婉有志节太子既废居于金墉衍请绝婚惠风号哭而归行路为之流涕及刘曜陷洛阳以惠风赐其将乔属属将妻之惠风拔剑距属曰吾太尉之女皇太子妃义不从贼属遂害之

唐

韦妃

按旧唐书后妃传肃宗韦妃父元珪兖州都督肃宗为忠王时纳为孺人及升储位为太子妃生兖王侗

绛王佺永和公主永穆公主天宝中宰相李林甫不利于太子妃兄坚为刑部尚书林甫罗织起柳绩之狱坚连坐得罪兄弟并赐死太子惧上表自理言与妃情义不睦请离婚元宗慰抚之听离妃遂削发被尼服居禁中佛舍西京失守妃亦陷贼至德二年薨于京城

明

常妃

按明外史后妃传懿文太子妃常氏开平王遇春女洪武四年四月册为皇太子妃十一年十一月薨谥敬懿建文元年追尊为孝康皇后永乐元年复称敬懿皇太子妃祔葬于懿文陵

继妃李氏

按明外史后妃传继妃李氏寿州人父本累官太常卿建文初尊为皇太后燕兵至金川门迓太后至军中述不得已起兵之故太后还未至宫中已火已随其子允居懿文陵永乐元年复称皇嫂懿文太子妃后生虞怀王雄英建文皇帝吴王允熲衡王允燧徐王允

东宫妃嫔部艺文一

临城公夫人停省太子妃令 梁简文帝

纁雁之仪既称合于二姓酒食之会亦有因不失亲若使榛栗殿修贄馈必举副笄编珈盛饰斯备不应妇见之礼独以亲阙顷者敬进醢醴已传妇事之则而奉盘沃盥不行侯服之家是知繁省不同质文异世临城公夫人于妃既是姑侄宜停省

册苏亶女为太子妃诏 唐太宗

诏曰配德元良必俟邦媛作丽储贰允归冠族秘书丞苏亶长女门袭轩冕家传义方柔顺表质幽闲成性训彰国史誉流邦国正位储闈实惟朝典可皇太子妃所司备礼册命施行

册太子妃文 同前

惟尔秘书丞苏亶长女族茂冠冕庆成礼训贞顺自然言容有则作合春宫实协三善曰嫔守器或昌万

乘备兹令典仰惟国章是用命立为皇太子妃钦惟
哉其光膺命可不慎欤

东宫妃嫔部艺文二

诗

太子纳妃太平公主出降 唐高宗

龙楼光景鲁馆启朝扉艳日浓妆影低星降婺辉
玉庭浮瑞色银榜藻祥徽云转花萦盖霞飘叶缀旗
雕轩回翠陌宝驾归丹殿鸣珠佩晓衣镂璧轮初扇
华冠列绮筵兰醕申芳宴环阶凤乐陈玳席珍羞荐
蝶舞袖香新歌分落素尘欢凝欢懿戚庆□庆初姻
暑阑炎气息凉早吹□频方期六合泰共赏万年春

奉贺太子纳妃 裴守真

云路移彤辇天津转明镜仙珠照乘归宝月重轮映
望园嘉宴洽主第欢娱盛丝竹扬帝熏簪裾奉宸庆
藂云蔼晓光湛露晞朝阳天文天景丽睿藻睿词芳
玉庭散秋色银宫生夕凉太平超邃古万寿乐无疆

奉和太子纳妃太平公主出降 刘祎之

梦梓光青陛秣桃霭紫宫德优宸念远礼备国姻崇
万户声明发三条骑吹通香轮送重景彩□引仙虹

奉和太子纳妃太平公主出降 郭正一

桂宫初服冕兰掖早升笄礼盛亲迎晋声芳出降齐
金龟开瑞钮宝翟上仙□转扇承宵月扬旌照夕霓

东宫妃嫔部纪事

汉书孝景薄皇后传后孝文薄太后家女也景帝为
太子时薄太后取以为太子妃

孝武陈皇后传后长公主嫖女也曾祖父陈婴与项
羽俱起后归汉为堂邑侯传子至孙午午尚长公主
生女初武帝得立为太子长公主有力取主女为妃
汉武故事初武帝为太子时长公主欲以女配帝时
帝尚少长公主指女问帝曰得阿娇好否帝曰若得
阿娇以金屋贮之主大喜乃以配帝阿娇后字也

西京杂记宣帝被收系郡邸狱臂上犹带史良娣合
采婉转丝绳系身毒国宝镜一枚大如八铢钱旧传
此镜见妖魅得佩之者为天神所福故宣帝从危获

济及即大位每持此镜感咽移辰常以琥珀笥盛之
緘以威里织成锦一曰斜文锦帝崩不知所在

汉书孝元王皇后传禁字稚君少学法律长安为廷尉史本始三年生女政君即元后也禁有大志不修廉隅好酒色多取傍妻凡有四女八男长女次君侠即元后政君次君力次君弟长男凤孝卿次曼元卿谭子元崇少子商子夏立子叔根稚卿逢时季卿唯凤崇与元后政君同母母适妻魏郡李氏女也后以口去更嫁为河内苟宾妻初李亲任政君在身梦月入其怀及壮大婉顺得妇人道尝许嫁未行所许者死后东平王聘政君为姬未入王薨禁独怪之使卜数者相政君当大贵不可言禁心以为然乃教书学鼓琴五凤中献政君年十八矣入掖庭为家人子岁余会皇太子所爱幸司马良娣病且死谓太子曰妾死非天命乃诸娣妾良人更祝诅杀我太子怜之且以为然及司马良娣死太子悲恚发病忽忽不乐因以过怒诸娣妾莫得进见者久之宣帝闻太子恨过诸娣妾欲顺适其意乃令皇后择后宫家人子可以虞侍太子者政君与在其中及太子朝皇后乃见政君等五人微令旁长御问知太子所欲太子殊无意于五人者不得已于皇后强应曰此中一人可是时政君坐近太子又独衣绛缘于诸长御即以为是皇后使侍中杜辅掖庭令浊贤交送政君太子宫见丙殿得御幸有身先是者太子后宫娣妾以十数御幸久者七八年莫有子及王妃壹幸而有身甘露三年生成帝于甲馆画堂为世适皇孙后三年宣帝崩太子即位是为孝元帝立太孙为太子以母王妃为婕后三日立为皇后

孝成许皇后传后大司马车骑将军平恩侯嘉女也元帝悼伤母恭哀后居位日浅而遭霍氏之辜故选嘉女以配皇太子初入太子家上令中常侍黄门亲迎者侍送还白太子欢悦状元帝喜谓左右酌酒贺我左右皆称万岁

孝哀傅皇后传后定陶太后从弟子也哀帝为定陶

王时傅太后欲重亲取以配王王入为汉太子傅氏女为妃

后汉书明德马皇后传后讳某伏波将军援之小女也少丧父母兄客卿敏惠早夭母蔭夫人悲伤发疾恍惚后时年十岁干理家事口制僮御内外谘禀事同成人初诸家莫知者后闻之咸叹异焉后尝久疾太夫人令筮之筮者曰此女虽有患状而当大贵兆不可言也后又呼相者使占诸女见后大惊曰我必为此女称臣然贵而少子若养他子者得力乃当逾于所生初援征五溪蛮卒于师虎贲中郎将梁松黄门侍郎窦固等因譖之由是家益失執又数为权贵所侵侮后从兄严不胜忧愤白太夫人绝窦氏婚求进女掖庭乃上书曰臣叔父援孤恩不报而妻子特获恩全戴仰陛下为天为父人情既得不死便欲求福窃闻太子诸王妃匹未备援有三女大者十五次者十四小者十三仪状发肤上中以上皆孝顺小心婉静有礼愿下相工简其可否如有万一援不朽于黄泉矣又援姑姊妹并为成帝婕妤葬于延陵臣严幸得蒙恩更生冀缘先姑当充后宫由是选后入太子宫时年十三奉承阴后傍接同列礼则修备上下安之遂见宠异常居后堂

贾贵人传贵人南阳人建武末选入太子宫中元二年生肃宗

蜀志敬哀皇后传后车骑将军张飞长女也章武元年纳为太子妃

魏志毛皇后传后河内人也黄初中以选入东宫明帝时为平原王进御有宠出入与同輿辇

晋东宫旧事皇太子纳妃有漆龙头支髻枕一银花环钮百副又曰皇太子纳妃有金涂连盘鸭灯一太子纳妃有绛地文履一量又曰皇太子纳妃有漆花簏二具

皇太子纳妃织成袞带白玉佩

皇太子纳妃四望车羽葆前后部鼓吹各一部又曰步摇一具九钿函盛之

太子有铜□头灯铜倚灯纳妃有金涂四尺长灯银涂二尺连盘灯

太子纳妃有白縠白纱白绢衫并紫结纓

皇太子纳妃有绛纱复裙绛碧结纓复裙丹碧纱纹双裙紫碧纱文双裙紫碧纱文纓纓双裙紫碧纱縠双裙丹碧杯文罗裙

太子纳妃有玳瑁钿镂镜台一

太子纳妃有龙头金缕交刀四银牙□彩带二副

太子纳妃有石砧一枚又捣衣砧杵十枚

皇太子纳妃有着衣大镜尺八寸银花小镜尺二寸漆匣盛翡翠铜镜二枚嵌金龙头受福莲华钩□四副

皇太子纳妃有绿石绮绢里□檐二

太子纳妃有青布碧里梁下帏一绀绢青布窗户帏各一

太子纳妃有彩杯文绮被一绛具文罗一幅一绛被罗□文四五幅被一又有七彩文绮被绛文罗面一太子纳妃有赤花双文簟

皇太子纳妃有□上屏风十二牒织成漆连银钩钮织成连地屏风十四牒铜环钮

皇太子纳妃同心扇二十单竹扇二十

太子纳妃有漆书银带唾壶一

皇太子初拜有铜博山香炉一枚纳妃

泰元中皇太子纳妃王氏有银涂博山莲盘三十香炉一

皇太子纳妃有绫裹屐五具绢裹屐五具

皇太子纳妃有绛直文罗□七彩杯文锦□五

皇太子纳妃有绛纱复裙绛碧结纓袄裙丹碧纱纹双裙紫碧纱纹双裙紫碧纱纹□纓纓双裙紫碧纱縠双裙丹碧杯文双裙

太子纳妃有绛地纹履一双

太子纳妃有绛绫袍一领

晋书惠帝贾皇后传后讳南风平阳人也小名□父充别有传初武帝欲为太子娶卫瓘女元后纳贾郭

亲党之说欲婚贾氏帝曰卫公女有五可贾公女有五不可卫家种贤而多子美而长白贾家种妒而少子丑而短黑元后固请荀顛荀勖并称充女之贤乃定婚始欲聘后妹午午年十二小太子一岁短小未胜衣更娶南风时年十五大太子二岁泰始八年二月辛卯册拜太子妃妒忌多权诈太子畏而惑之嫔御罕有进幸者帝常疑太子不慧且朝臣和峤等多以为言故欲试之尽召东宫大小官属为设宴会而密封疑事使太子决之停信待反妃大惧倩外人作答答者多引古义给使张泓曰太子不学而答诏引义必责作草主更益谴负不如直以意对妃大喜语泓便为我好答富贵与汝共之泓素有小才具草令太子自写帝省之甚悦先示太子少傅卫瓘瓘大踧踖众人乃知瓘先有毁言殿上皆称万岁充密遣语妃云卫瓘老奴几破汝家妃性酷虐尝手杀数人或以戟掷孕妾子随刃堕地帝闻之大怒已修金墉城将废之充华赵粲从容言曰贾妃年少妒是妇人之情耳长自当差愿陛下察之其后杨珧亦为之言曰陛下忘贾公闾耶荀勖深救之故得不废惠帝即位立为皇后

愍怀太子传初贾后母郭槐欲以韩寿女为太子妃太子亦欲婚韩氏以自固而寿妻贾午及后皆不听而为太子聘王衍小女惠风太子闻衍长女美而贾后为谧聘之心不能平

明穆庾皇后传后讳文君颍川鄢陵人也父琛见外戚传后性仁慈美姿仪元帝闻之聘为太子妃以德行见重

安僖王皇后传后讳神爱琅邪临沂人也父献之见别传母新安愍公主后以太元二十一年纳为太子妃

宋书少帝司马太妃传太妃讳茂英河内温人晋恭帝少女也初封海盐公主少帝以公子尚焉宋初拜皇太子妃

前废帝何皇后传后讳令婉庐江灊人也孝建三年

纳为皇太子妃大明五年薨于东宫徽光殿时年十七葬

阙

谥曰献妃上更为太子置内职二等曰保林

曰良娣纳南中郎长史太山羊瞻女为良娣宜都太守袁僧惠女为保林

后废帝江皇后传后讳简珪济阳考城人北中郎长史智渊孙女太始五年太宗访求太子妃而雅信小数名家女多不合后弱小门无强荫以卜筮最吉故为太子纳之讽朝士州郡令献物多者将直百金始兴太守孙奉伯止献琴书其外无余物上大怒封药赐死既而原之

南齐书武穆裴皇后传后讳惠昭河东闻喜人也祖朴之给事中父玘之左军参军后少与豫章王妃庾氏为娣姒庾氏勤女工奉事太祖昭后恭谨不倦后不能及故不为舅姑所重世祖家好亦薄焉性刚严竟陵王子良妃袁氏布衣时有过后加训罚升明三年为齐世子妃建元元年为皇太子妃三年后薨谥穆妃葬休安陵

文安王皇后传后讳宝明琅邪临沂人也祖韶之吴兴太守父煜之太宰祭酒宋世太祖为文惠太子纳后桂阳贼至太祖在新亭传言已没宅复为人所抄掠文惠太子竟陵王子良奉穆后庾妃及后挺身送后兄昺之家事平乃出建元元年为南郡王妃四年为皇太子妃无宠太子为宫人制新丽衣裳及首饰而后口帷陈设故旧钗镊十余枚

东昏褚皇后传后名令璩河南阳翟人太常澄女也建武二年纳为皇太子妃明年谒敬后庙东昏即位为皇后

梁书太宗王皇后传后讳灵宾琅邪临沂人也祖俭太尉南昌文宪公后幼而柔明淑德叔父暕见之曰吾家女师也天监十一年拜晋安王妃生哀太子大器南郡王大连长山公主妙大通三年十月拜皇太子妃

陈书废帝王皇后传后金紫光禄大夫固之女也天嘉元年为皇太子妃废帝即位立为皇后

后主沈皇后传后讳婺华仪同三司望蔡贞宪侯君理女也母即高祖女会稽穆公主主早亡时后尚幼而毁瘠过甚及服毕每至岁时朔望独坐涕泣哀恸左右内外咸敬异焉太建三年纳为皇太子妃

魏书明元杜皇后传后魏郡邺人阳平王超之妹也初以良家子选入太子宫有宠生世祖

景穆郁久闾皇后传后河东王毗妹也少以选入东宫有宠真君元年生高宗

献文李皇后传后中山安喜人南郡王惠之女也姿德婉淑年十八以选入东宫显祖即位为夫人生高祖

北齐书后主斛律皇后传后斛律氏左丞相光之女也初为皇太子妃后主受禅立为皇后

周书宣帝杨皇后传后名丽华隋文帝长女帝在东宫高祖为帝纳后为皇太子妃宣政元年闰六月立为皇后

宣帝朱皇后传后名满月吴人也其家坐事没入东宫帝之为太子后被选掌帝衣服帝年少召而幸之遂生静帝

隋书独孤皇后传时太子多内宠妃元氏暴薨后意太子爱妾云氏害之由是讽上黜高颀竟废太子

唐书太宗长孙皇后传后长孙氏河南洛阳人其先魏拓拔氏后为宗室长因号长孙高祖大丞相冯

翊王曾祖裕平原公祖兕左将军父晟字季涉书史趨鵲晓兵仕隋为左骑卫将军后喜图传视古善恶以自鉴矜尚礼法晟兄炽为周通道馆学士尝闻太穆劝抚突厥女心志之每语晟曰此明睿人必有奇子不可以不图昏故晟以女太宗后归宁舅高士廉妾见大马二丈立后舍外惧占之遇坤之泰卜者曰坤顺承天载物口疆马地类也之泰是天地交而万物通也又以辅相天地之宜繇协归妹妇人事也女处尊位履中而居顺后妃象也时隐太子衅阅已构

后内尽孝事高祖谨承诸妃消释嫌疑及帝授甲宫中后亲慰勉士皆感奋寻为皇太子妃

高宗废后王氏传后并州祁人魏尚书左仆射思政之孙从祖母同安公主以后婉淑白太宗以为晋王妃王居东宫妃亦进册

旧唐书孝敬皇帝弘传弘纳右卫将军裴居道女为妃所司奏以白雁为贄适会苑中获白雁高宗喜曰汉获朱雁遂为乐府今获白雁得为婚贄彼礼但成谣颂此礼便首人伦异代相望我无口德也裴氏甚有妇礼高宗尝谓侍臣曰东宫内政吾无忧矣

唐书中宗韦庶人传韦氏京兆万年人祖弘表贞观中曹王府典军帝在东宫后被选为妃

元宗元献皇后传后杨氏华州华阴人曾祖士达为隋纳言天授中以武后母党追封士达为郑王父知庆太尉帝在东宫后以景云初入宫为良媛时太平公主忌帝而宫中左右持两端纤悉必闻媛方娠帝不自安密语侍读张说曰用事者不欲吾多子奈何命说挟剂以入帝于曲室自煮之梦若有介而戈者环鼎三而三煮尽覆以告说说曰天命也乃止生男是为肃宗帝即位为贵嫔其娣节愍太子妃也

肃宗张废后传后邓州向城人家徙新丰祖母窦昭成皇后女弟也元宗幼失昭成母视姨鞠爱笃备帝即位封邓国夫人亲宠无比五息子曰去惑去疑去奢去逸去盈皆显官去盈尚常芬公主去逸生后肃宗为忠王时纳韦元娃女为孺人既建太子以孺人为妃后为良娣妃兄坚为李林甫构死太子惧请与妃绝毁服幽禁中安禄山反陷于贼至德中薨始妃既绝良娣得专侍太子慧中而能辩能迎意傅合元宗西幸娣与太子从度渭民障道乞留复长安太子不听中人李辅国密启娣又赞其谋遂定计北趣灵武时军卫单寡夕次娣必寝前太子曰暮夜可虞且捍贼非妇人事宜少戒对曰方多事若仓卒妾自当之殿下可徐为计驻灵武产子三日起缝战士衣太子口止对曰今岂自养时邪

肃宗章敬皇后吴氏传后濮州濮阳人父令珪以郾丞坐事死故后幼入掖庭肃宗在东宫宰相李林甫阴构不测太子内忧鬓发斑秃后入谒元宗见不悦因幸其宫顾廷宇不汛扫乐器尘蠹左右无嫔侍帝愀然谓高力士曰儿居处乃尔将军叵使我知乎诏选京兆良家子五人虞侍太子力士曰京兆料择人得以借口不如取掖庭衣冠子可乎诏可得三人而后在中因蒙幸忽寢厌不寤太子问之辞曰梦神降我介而剑决我肋以入殆不能堪烛至其文尚隐然生代宗为嫡皇孙生之三日帝临澡之孙体孱弱负姆嫌陋更取它宫儿以进帝视之不乐姆叩头言非是帝曰非尔所知趣取儿来于是见嫡孙帝大喜向日视之曰福过其父帝还尽留内乐宴具顾力士曰可与太子饮一日见三天子乐哉后性谦柔太子礼之甚渥年十八薨

顺宗庄宪皇后王氏传后琅邪人祖王难得有功名于世代宗时后以良家选入宫为才人顺宗在藩帝以才人幼故赐之为王孺人是生宪宗王在东宫册为良娣

宪宗懿安皇后传后郭氏汾阳王子仪之孙父暖尚升平公主实生后宪宗为广陵王聘以为妃顺宗以其家有大功烈而母素贵故礼之异诸妇是生穆宗穆宗恭僖皇后传后王氏越州人本仕家子幼得侍帝东宫生敬宗长庆时册为妃

穆宗宣懿皇后传后韦氏失其先世穆宗为太子后得侍生武宗长庆时册为妃

敬宗郭贵妃传妃右威卫将军义之女失义何所人长庆时妃以容选入太子宫太子即位为才人生晋王普帝以早得子又淑丽冠后庭故宠异之

懿宗郭淑妃传妃幼入郾王邸宣宗在位春秋高恶人言立太子事王以嫡长居外宫心常忧惴妃护侍左右慰安起居终得无恙

宋史钦宗朱皇后传后开封祥符人父伯材武康军节度使钦宗在东宫徽宗临轩备礼册为皇太子妃

孝宗成穆郭皇后传后开封祥符人奉直大夫直卿之女孙其六世祖为章穆皇后外家孝宗为普安郡王时纳郭氏封咸宁郡夫人生光宗及庄文太子魏惠宪王愷邵悼肃王恪绍兴二十六年薨年三十一追封淑国夫人三十一年用明堂恩赠福国夫人既建太子追封皇太子妃

光宗慈懿李皇后传后安阳人庆远军节度使赠太尉道之中女初后生有黑凤集道营前石上道心异之遂字后曰凤娘道帅湖北闻道士皇甫坦善相人乃出诸女拜坦坦见后惊不敢受拜曰此女当母天下坦言于高宗遂聘为恭王妃封荣国夫人进定国夫人干道四年生嘉王七年立为皇太子妃性妒悍尝诉太子左右于高孝二宫高宗不恠谓吴后曰是妇将种吾为皇甫坦所误

度宗全皇后传后会稽人理宗母慈宪夫人侄孙女也略涉书史幼从父昭孙知岳州开庆初秩满归道潭州时大元兵自罗鬼入破全衡永桂围潭州人有见神人卫城者已而潭独不下逾年事平至临安会忠王议纳妃初丁大全请选知临安府顾口女已致聘矣大全败口亦罢去台臣论口大全党宜别选名族以配太子臣僚遂言全氏侍其父昭孙往返江湖备尝艰险其处贵富必能尽警戒相成之道理宗以母慈宪故乃诏后入宫问曰尔父昭孙昔在宝佑间没于王事每念之令人可哀后对曰妾父可念淮湖之民尤可念也帝深异之语大臣曰全氏女言辞甚令宜配冢嫡以承祭祀景定二年十一月诏封永嘉郡夫人十二月册为皇太子妃

金史显宗孝懿皇后传后徒单氏其先忒里辟刺人也曾祖抄从太祖取辽有功命以所部为猛安世袭之祖婆卢火以战功多累官开府仪同三司赠司徒齐国公父贞尚辽王宗干女梁国公主加驸马都尉赠太师广平郡王后以皇统七年生于辽阳母梦神人授以宝珠光焰满室既寤而生红光烛于庭后性庄重寡言父母尝令总家事细大毕办诸男不及也

世宗初即位贞为御史大夫自南京驰见世宗喜谓之曰卿虽废主腹心臣然未尝助彼为虐况卿家法可尚其以卿女为朕子妃及显宗为皇太子大定四年九月备礼亲迎于贞第世宗临宴尽欢而罢是年十一月显宗生辰初封为皇太子妃八年七月上遣宣徽使移刺神独干以名马宝刀御膳赐太子及妃仍谕之曰妃今临蓐愿平安得雄有庆之后宜以此刀置左右既而皇孙生是为章宗时上幸金莲川次冰井翌日上临幸抚视宴甚欢又赐御服佩刀等物谓显宗曰祖宗积庆且皇后阴德至厚而有今日社稷之洪福也又谓李石纆石烈志宁曰朕诸子虽多皇后止有太子一人而已今幸得嫡孙观其骨相不凡又生麻达葛山山势衍气清朕甚嘉之因以山名为章宗小字后素谦逊每畏其家世崇宠见父母流涕而言曰高明之家古今所忌愿善自保持其后家果以海陵事家败盖其远虑如此世宗尝谓诸王妃公主曰皇太子妃容止合度服饰得中尔等当法效之

显宗昭圣皇后传后刘氏辽阳人天眷二年九月己亥夜后家若见有黄衣女子入其母室中者俄顷后生性聪慧凡字过目不忘初读孝经旬日终卷最喜佛书世宗为东京留守因击球见而奇之使见贞懿皇后于府中进退闲雅无恣睢之色大定元年选入东宫时年二十三

元史裕宗徽仁裕圣皇后传后伯蓝也怯赤一名阔阔真弘吉刺氏生顺宗成宗先是世祖出田猎道渴至一帐房见一女子缉驼茸世祖从觅马湏女子曰马湏有之但我父母诸兄皆不在我女子难以与汝世祖欲去之女子又曰我独居此汝自来自去于理不宜我父母即归姑待之须臾果归出马湏饮世祖世祖既去叹息曰得此等女子为人家妇岂不美耶后与诸臣谋择太子妃世祖俱不允有一老臣尝知向者之言知其未许嫁言于世祖世祖大喜纳为太子妃后性孝谨善事中宫世祖每称之为贤德媳妇

侍昭睿顺圣皇后不离左右至混口所用纸亦以面擦令柔软以进一日裕宗有病世祖往视见口上设织金卧褥世祖愠而语之曰我尝以汝为贤何乃若此耶后跪答曰常时不曾敢用今为太子病恐有湿气因用之即时彻去

明外史建文皇后传后马氏光禄少卿全女洪武二十六年册为皇太孙妃

仁宗诚孝皇后传后张氏永城人父兵马副指挥麒具外戚传洪武十六年册为燕世子妃永乐二年册为皇太子妃后始为太子妃操妇道至谨雅得成祖及仁孝皇后欢而仁宗为太子颇被汉赵二王间体肥硕复不习骑射成祖恚至减太子宫膳濒易者数矣卒以后故得不废

宣宗恭让皇后传后胡氏名善祥济宁人父荣生七女洪武初长女入宫为女官荣授锦衣卫百户后其第三女也永乐十五年册为皇太孙妃久之为皇太子妃

宪宗孝贞皇后传后王氏上元人父中军都督镇见外戚传初宪宗在东宫英宗为择配得十二人选后及吴氏柏氏留宫中

孝宗孝康皇后传后张氏兴济人母金梦月入怀而生后成化二十三年选为太子妃

光宗孝元皇后传后郭氏顺天人父维城以女贵封博平伯进侯卒后于万历二十九年册为皇太子妃